

Visoki predstavnik se obratio Vijeću Europe

Brža provedba uvjeta Vijeća Europe koje je potrebno ispuniti nakon prijema zemlje u ovu organizaciju donijeće jasne koristi građanima Bosne i Hercegovine, rekao je visoki predstavnik Paddy Ashdown u svom današnjem obraćanju Vijeću Europe. "Bez obzira na sav napredak koji je BiH postigla, i dalje ostaje puno toga što je potrebno uraditi da bi se dostigli europski standardi u oblastima koje prati Vijeće Europe" rekao je visoki predstavnik Komisiji za monitoring pri Parlamentarnoj skupštini Vijeća Europe u Strasbourg. "Ukoliko se napredak ne ubrza, građani BiH biće lišeni osnovnih prava, a napredak BiH na putu ka Evropi biće usporen. Ono čega još uvijek nema su uvjerljivi, stalni napor novih vlada i parlamenta na usvajanju, ratificiranju i implementiranju ključnih konvencija i zakona na kojima insistira Vijeće Europe. Sada moramo osigurati da organi BiH u značajnoj mjeri ubrzaju rad na ispunjenju ovih uvjeta."

Visoki predstavnik je rekao da program pod nazivom "Posao i pravda" – čiji je cilj unapređenje vladavine zakona i izgradnja privrede koja će podstići zaposlenost – zajedno sa ključnim reformama kao što je uvođenje jedinstvene carinske uprave i sistema PDV-a i carina na teritoriji cijele zemlje, organima vlasti daje jasan plan mjera za integraciju BiH u Evropu i poboljšanje životnog kvaliteta građana.

"Monitoring koji provodi Vijeće Europe je ključni zaštitni mehanizam koji osigurava da BiH ide u pravom pravcu," rekao je.

Visoki predstavnik također je izvijestio o napretku u formiranju vlada. "Sastav nove državne vlade odražava proširenu i ojačanu strukturu Vijeća ministara, koja je bila rezultat pet sedmica pregovora između stranaka, u organizaciji OHR-a,"

rekao je. Istakao je da nova vlada Republike Srpske "predstavlja prvu multietničku vladu u RS, u kojoj su ispoštovane ustavne promjene iz 2002. godine."

U zaključku, visoki predstavnik je upozorio da međunarodna zajednica "mora odoljeti iskušenju da radi posao vlada; umjesto toga, ona treba podržati premijere u nastojanjima da različite administracije okupe oko programa reforme."

Dok je bio u Strasbourg, visoki predstavnik također se sastao sa Generalnim sekretarom Vijeća Europe Walter Schwimmerom, Generalnim direktorom za politička pitanja u Vijeću Europe, Klausom Schumannom, kao i sa Grupom izvjestilaca Komiteta ministara o pitanjima demokratske stabilnosti, čija je odgovornost da omogući detaljnu provedbu kriterija koji se pred BiH postavljaju nakon njenog prijema u ovu organizaciju.